



ATASSUT INATSISARTUNI

ATASSUT

UKA 2013/106-2

Siverth K. Heilmann

24.10.13

UKA13-imit atuutilersumik uranimik aamma aatsitassanik qinngornilinnik piiasarnermik attueqqusinngilluinnarnerup atorunnaarsinnissaannik Inatsisartut akuersissuteqarnissaannik Inatsisartut aalajangiussinissaannut siunnersuut.

(Inuussutissarsiornermut Aatsitassaqarnermullu Naalakkersuisoq)

Maanga killippugut, uranimik aamma aatsitassanik qinngornilinnik piiasarnermik attueqqusinngilluinnarnerup atorunnaarsinnissaanik Inatsisartut akuersissuteqarnissaannik Inatsisartut aalajagiussinissaannut siunnersuut, Naalakkersuisut sinnerlugit Inuussutissarsiornermut Aatsitassaqarnermullu Naalakkersuisup siunnersuutaa aappassaaneertussanngorparput, taamaalillatalu tunngaviusumik isummertussanngorluta.

Inatsisartut Aatsitassanut Ataatsimiititaliaata isumaliutissiissutaa ATASSUT-mit sukumiisumik misissorparput erseqqisumillu maannangaaq nalunaarutigissavarput ataatsimiititaliam Amerlanerussuteqartut oqaaseqaataat tamakkiisumik ATASSUT-mit tapersensoratsigu, taamaalillatalu Naalakkersuisut siunnersuutaat taamatut iluseqarluni akuersissutigineqarnissaa tamakkiisumik taperserlugu taassisalluta matumuuna nalunaarutigissavarput.

Taamatut naqissuseeriarluta ATASSUT-mit ilassutitut makkuninnga oqaaseqaateqassaagut:

Alloriarfissangormat alloriarnaveersaassaagut taava? ATASSUT-mit taamak ingerlarusunngilagut, ATASSUT-mit periarfissat isigalugit akisussaassusilimmik ingerlarusuppugut.

Naak massa Inatsisartuni illuatungiliuttut akornanni oqaatsit kusanangilluinnartut, pineqartorlu pillugu innuttaasut nalorninissaannik aammalu akerliunissaannik sunniiniarnissamik



ATASSUT INATSISARTUNI

siunertaqarlutik, allaat sianigisaqanngitsutut naqissuserniarneqaraluarluta ATASSUT-mit qularnata inissisimavugut.

Inuaqatigiit Kalaallit aningaasarsiornikkut namminiilernissarput kissaatigeqaarput

Inuaqatigiit Kalaallit inuussutissarsiutitigut ineriertortitserusoqaagut

Inuaqatigiit Kalaallit aningaasaliuumasunik, taamaalillutillu suliffissanik qulakkeerinnittunik qammaarusoqaagut.

Eqqaamaneqassaaq Naalakkersuisut pissuserissaarlutik aammalu unneqqarillutik Inatsisartunut aperippuit, Naalakkersuisulli siulii aatsitassarsiorfiutileqatigiinnut neriusaarillutik Inatsisartut innuttaasullu apereqqaarnagit killissarititaasoq qaangerlugu uraneqassutsimik misissuisoqarnissaanik akuersaarnikuupput.

Ulluni kingullerni Inatsisartuni illuatungiliuttut siuttoralugit inuaqatigiinni aalassassimaarnissamik annertuumik kaammattuisoqarpoq, ajoraluartumillu takusinnaasarput naapertorlugu illuatungiliuttut innuttaasunik isumaqatissarsiornertik annertuumik iluatsippaat, naak massa nammineq apereqqaannguaratik aqqutissiuutartik pisortatigoortumik Inatsisartunillu tunuliaquteqartumik iluarsiivigineqarnissaa aqqutissiuunniarneqartoq.

Aatsitassanut suliassaqarfimmi nassuaat 2013-mi Naalakkersuisut erseqqissaateqarnerat ATASSUT-mit issualaassavarput:

“2010-imi misissuinermut akuersissutinut atugassarititaasussat nutaat Naalakkersuisut akueraat. Atugassarititaasussat taakkua, peqarfik qinngorernik ulorianartunik pinngooqqaatilinnik nunami pinngortitamiittartumit annertussutsinit annertunerusumik akoqartillugu, imminut akilersinnaatsutsimut misissuinermitk suliaqartoqarnialernerani avatangiisink, isumannaallisaanermik peqqinnissamillu misissuinermitk suliaqarnissamutakuersissuteqarfingineqarnissamik qinnuteqarnissamut periarfissiippit.



ATASSUT INATSISARTUNI

Misissuinernik matuma siuliani taaneqartutut suussusilinnik Naalakkersuisut
akuersissuteqarnerannut tunngaviuvoq, suliassanut qinngorernik ulorianartunik nunami
pinngortitamiittartumit annertunerusumik akoqartunut tunngatillugu avatangiisinut,
isumannaallisaanermut peqqinnissamullu tunngasut pillugit annertunerusumik ilisimasaqalernissap
kiissaatigineqarnera.

Taamatuttaaq Australiamut ingerlatseqatigiiffiata GME-p misissuinissamut akuersissutip pigisaata
annertusineqarnissaa siusinnerusukkut Naalakkersuisuusut akueraat, taamaalilluni taanna uranimik
misissuinissamut akuersissummik tunniussilluni.”

Tassa aatsitassanut suliassaqarfimmi nassuaat 2013-mi Naalakkersuisut taamatut
erseqqissaateqarput.

Matumani Narsap eqqaani Kuannersuarni aatsitassarsiorniarlutik misissuisut Greenland Minerals
and Energy pineqarput, pineqartut qulaatiinnarumanagut ATASSUT-mit ingerlatseqatigiiffik
paasiniaaffigaarput ingerlatsinerat pillugu assigiinngitsunik paasiaqarusulluta.

ATASSUT-mit paasivarput suliffeqarfiup 270 mio. kr. missaat misissuinerminut maannamut
atormagai. Taamatuttaaq aatsitassarsiornermik ingerlatsisinnaanissaminnt akuerineqassagunik
tagginnikuuaat 2,5 mia. kr.-it missaannik amerlassuseqartunik aningaasaliisoqartariaqartoq.

ATASSUT-mit suli paaserusupparput Naalakkersuisuusimasut siunertarisimaneraat
ingerlatseqatigiiffik hundredemillionilikkaanik aningaasartorteriarlugu anisinneqarnissaa
siunertarineqarsimanersoq imaluunniit aatsitassarsiorsinnaatilernissaannut akuersissummik
tunniussiumaarnissaq siunertaralugu annertusisamik misissuinissaannik akuersissuteqarsimanersut?

Tassami misissuinissaminnut annertusaajumallutik kissaataanni ersersinneqarpoq allaat
misissuinerminnik ingerlaqqinnissartik apeqqusersimagaat tamatumalu malitsigisaanik
ningaasaliisussarsiornertik annertusisamik misissuisinnaatitaassanngikkunik, Naalakkersuisullu



ATASSUT INATSISARTUNI

kissaatigisimavaat aningaasaliisussarsiornertik ingerlatiinnassagaat aammalu misissuinerminnik ingerlatsiinnassasut, taamaammallu akuersisummik tunineqarsimasut.

ATASSUT-mit assut takujuminaatsipparput Inatsisartuni suna assortuussutigineqarnersoq, takujuminaatsipparput innuttaasut avissaartuunnissaannut Inuit Ataqatigiit sooq siuttunersut, uffa massa siuttuuffigisaminnik misissuinerit aningaasaliisussarsiornerillu ingerlanneqartut.

Navianarluinnartumut killeqqavugut, avatitsinniit alaatsinaaqqissaarneqarpugut, naalakkersuinikkut qanoq inissisimanersugut alaatsinaaqqissaarneqarpoq, ullumikkullu taamak avissaaqqatigitilluta nunatta aningaasaliiffigineqarsinnaaneranut periarfissagut ullaat tamaasa sanngiillisartuarpagut, tamanna assut ilungersunartuusoq ATASSUT-mit naliliivugut.

Naalakkersuisooqatigiit pasineqarput innuttaasut qulaatiinnarlugit aalajangiiniartoqartoq, tamanna eqqunngilluinnartoq Inuit Ataqatigiit namminneerlutik aamma upternarsarsinnaavaat!

Uran pillugu Inatsisartuni oqlaluuserinninnerit arlallit ingerlanneqartareerput, tamatuma saniatigut Inatsisartuni ilaasortat piffissap ingerlanerani uran pillugu apeqqutit arlalissuit Naalakkersuisunut apuunneqartarput taakkulu akissutaat inuiaqatigiinnut siammerneqartarput.

Assersuutigiinnarlugu ATASSUT sinnerlugu Inatsisartuni ilaasortat 10. Maj 2010-mi Aatsitassanik uranitalinnik aatsitassarsiornermi uranip annertussusia qummut killilerlugu aatsitassarsiertoqarsinnaanissaa Naalakkersuisut suliniutigilersaarneraat Naalakkersuisut aperineqarput, Naalakkersuisullu paasisitsiniaanissamik tusarniaanernillu annertuunik ingerlatsisoqarnissaanik taamanikkut neriorsuipput, ilaatigut imatut akissuteqarlutik:

“Naalakkersuisut politikkeraat, ammasumik oqartussaaqatigiinnerullu aqqani, inuiaqatigiinni kikkut tamarmik isummaminnik annissinissaannut periarfissaqartillugit oqallinnissaq pisariaqartinneqartoq.



ATASSUT INATSISARTUNI

Siusinnerusukkut nalunaarutigineqareersutut 2010-imi innuttaasunit, soqtigisaqaqatigiinnit aammalu sulianik immikkut ilisimasalinnit arlaannaannulluunniit attuumassuteqanngitsunit isummersuuterpassuit Naalakkersuisut tusaaniarniarpaat.

Tassunga atatillugu siunertaavoq, sulianut immikkut ilisimasallit arlaannaannulluunniit attuumassuteqanngitsut uranimik allanillu qinngorernik ulorianartunik akulinnik misissuinermut piaanermullu paasissutissiinissaannik ilisimatitsissuteqarnissaannillu qinnuigineqarnissaat.

Paasitsinsiniaanermut ilaatillugu atuagaaraq aatsitassanik il.il. misissuinermut/piaanermut tunngatillugu pissutsinik assigiinngitsunik nassuiaasoq saqqummersinneqassaaq.

Taamatuttaaq radiukkut/TV-ikkut aallakaatitassiortoqassaaq, tassani sulianut immikkut ilisimasalinnit arlaannaannulluunniit attuumassuteqanngitsunit aatsitassarsiornermik ingerlatsinerup inuaqatigiinnut attuumassuteqartortai saqqummiunneqassallutik.

Kiisalu kattuffiit innuttaasullu assigiinngitsut suliaqarfissanut tapersersuillutik akerliullutillu oqaaseqarsinnaasussat peqataatinneqassapput.”

Naalakkersuisut siuliisa paasisitsinsiaanissamik, tusarniaanissanik aammalu sukumiisumik misissuisitsinissanik imannaannaq neriorsuuteqarnikuupput, massakkullu Naalakkersuisunut pisuutitsissutigineqarpoq innuttaasut qulaatiinnarlugit aalajangerniartoqartoq.

Massakkut Naalakkersuisuusut Naalakkersuisuusimasut sumiginnarsimasaannut pisuutinniarneqarsinnaanngillat, taamaammat pisuutitsissutit massakkut illuatungiliuttunut utertinneqartariaqartut ATASSUT-mit isumaqarlunnarpugut.

Naggataatigut ATASSUT-mit uteqqiilaassaagut:

Inuaqatigiit Kalaallit aningaasarsiornikkut namminiilernissarput kissaatigeqaarput
Inuaqatigiit Kalaallit inuussutissarsiutitigut ineriertortitserusoqaagut



ATASSUT INATSISARTUNI

Inuiaqatigiit Kalaallit aningaa saliiumasunik, taamaalillutillu suliffissanik qulakkeerinnittunik qammaarusoqaagut.

Aalajangernissamut matumunnga akerliusut tusaavassi, qularutigissanngilarsi pingaartitasi aamma uagut pingaartikkatsigit.

Akisussaassusilimmik aammalu inuiaqatigiit nunarpullu sernigalugit aatsitassarsiorneq ingerlanneqassasoq ATASSUT-mit qulakkeerinnissaagut.

Inuit, uumasut, nuna avatangiisillu annertunerpaamik illersorneqarnissaat sutigut tamatigut sallijuassaaq tamanna aamma aatsitassanut inatsimmi eqqanaarneqarpoq, taamaattorli aamma aatsitassanik galluinermi uran ilanngullugu qaqitaq nioqqutigineqassappat malittarisassat annertusisat sukangalluinnartut avaqqutaarneqarsinnaanngitsullu tunngavigineqarnissaat ATASSUT-mit qulakkeerinninnissarput qularutigineqassanngilaq.

Uran immini siunertaralugu qalluiniarluni qinnuteqartoqassappat, piumasaqaatit sakkortunerpaat nunarsuarmioqatigiit isumaqatigiissutaannit sakkukinnerunngitsut aammalu qummut killiliinissaq isumannaarneqassaat pillugu ATASSUT-mit qulakkeerinnittuussaagut.

ATASSUT taaseqataassaaq nunarput pillugu

ATASSUT taaseqataassaaq meerartagut pillugit

ATASSUT taaseqataassaaq kingulissagut pillugit

ATASSUT taaseqataassaaq sutigut tamatigut namminilivinnissarput pillugu

Suli annertunerusumik ATASSUT-mit oqaaseqarsinnaagaluarluta oqallinneq tassunga killinnavianngimmat matumuuna kingumut erseqqissassavarput Aatsitassanut ataatsimiititaliami amerlanerussuteqartut inassuteqaataat akuersaassagatsigu, taamaammallu siunnersuut taamatut iluseqarluni akuersaarneqarnissaa inassutigissavarput, tamatumalu ilutigisaanik allannguutissatut siunnersuut taamatut iluseqarluni itigartinneqassasoq inassutigissavarput.